

1 Pita

Vu'a Anejijihina

1 ¹Na Pita Jesu Keriso oni apasoru ea ka'ene iji pijihara ka'ene ani ani va'e Ponitasi Karesia Kapatosia Esia 'ee Pitinia ijino apiora'e rena hijuijihia puna'e veju. ²Ehu nune ja nimaa rohunijaho Godi Amoho anejiji Hu nihena kimarena ijjihuna'e ja iji pijihana. 'Ene Godoni 'Aveni venae ja marasahareje Huni 'aijara venae joni sisea pa'arehuna. Godira ja maiji vwihanie matauhunijaho joni vaji itu'ona parahuna.

Nimairoa Nimaa Nimai 'Ee Maranúajaho Ija'ina'e Namuna

³Veje núni Natohwa Jesu Keriso oni Godia 'ee Omiji ta'aroha. Hura ni'lima'ura numirumana vajijino venume Jesu Kerisora kwama 'urinaji nimaa rojajihuna'e nú kú'o nahenuma majama hihunijaho apejara. ⁴'Ene aachi'a ka'ene 'ekahunijija papa'arehune sisea pane 'ee pasakarahunijija kahi akúpa 'ahi jona 'ajohau'e navu. ⁵Godira Huni harurijino 'ajoha'eju'e joni nimairoa vajijino ni'ajihajaho vea túchamaijino samaahirave kahuna'e amairiaramu. ⁶'Enakúne ijjihuna'e ja ni'lima'ura'e teamanaha. Iviamai ja muka tu'u'wi sisei hiju kaivo túna'ijaho ja teamanama parahuna. ⁷'Ene joni nimairoa ijara korutia asimana'omo korutia ka'ene siserane 'ee pa'arehunijija veni vena kivuja'ina'e joni nimairoa vena kive roe areri rena parahuna. Jesu Kerisora ro'amani veijino ja ta'arorahe joni pinana veje 'urine 'ee joni iha ichutoi rehuna. ⁸Ja Hu pakavu vo ja Hu oja mahu 'ee ja Hu iviama pakavu vo ja Hu nimaa roju. Ijjihuna'e ja ni'lima'ura temarasahé 'ee temara ka'ene niho'o ira areri pa'warahunijino aromahuna. ⁹Jara nimaa rojujhuni ehijaho joni 'avena ni'ajihe maranihuna. ¹⁰Poropetiepo ike ni'ajuhunakaho hami same 'ee aposaravi'i maiji vwihanúhuna ka'ene joni rohunijaho 'waravara. ¹¹Ea irana ho vea iraki ijaho rehuniji henaka'i savari vajijino Keriso oni 'Avena ka'ene puni vaji hinajara raka ka'ene túna'i Kerisora haha hiana ka'ene apene 'ee Huni pinana ka'ene 'urihunijaho najahana. ¹²Pu najahume kavajija pu pupusu pani'ajaravara. 'Enakaivo ja ni'ajihe ike uné raka ka'ene rejajija ea ka'ene vu'a maa maiu'ina 'waravi'inijiwo Godoni 'Avena ka'ene akúpi

'ahi ranavume roajihuni vaji uneunecha ka'ene 'ona oji'inapo he'irono ura renaujija 'waravara.

Kara Ariramaa Hihuna 'Umenajina

¹³Ijihuna'e ham i vwiha 'ee ojono joni oja 'ajo'arame joni nimaa roijaho maji vwihanúana ka'ene Jesu Kerisora ro'amajino apena rohuni jihuni toi rana'avara. ¹⁴Areri sesamaa ka'ene vu'ataa heji'inapo vejula'ina'e re'avara kaivo ja paki'eje jara nitama hahapo itunavu'e pahena pakavi'i vejula'ina pave'avara. ¹⁵'Enakaivo Ea Arira Maa ka'ene ja iji pijihaji vare'ina'e re'avara. Joni kara vajijaho akume ariramaa'e re'avara. ¹⁶Ijihuni majaho Godoni ira vaji ika'ina'e vejara. Na ariramaakúna ja 'u'o ariramaa'e hi'avara. ¹⁷Ja Hu Oma ka'ene ronu kwino pareji'ina 'ee eha ariramaa vajihuna 'wa'avajaho jara iraka ka'ene iki mwe'i hine ve'avajija Huni hora vena'avara. ¹⁸Ja nihena kavuja'ina'e ja kú'o 'imenaume maraniajaho sahu jopuni tamaniji vene 'ee korutia siruva 'imenaue maranihuna pana. ¹⁹'Enakaivo ja Keriso oni 'aa ka'ene mavarasa'inijino 'imenaue 'ekara. Hu areri sipia ka'ene niho'o chiha titana 'ee matana pa'aja'inijina. ²⁰Nitama mai'o mwe'a paveji'ini Hu iji pijahume hinana'omo vea túchamakino jonijihuna'e ranavume roana. ²¹Ja Huni vajijino Godi nimaa rojara. Ijihuni majaho Hura vejume Hu kwamajaho 'urinana 'ee Huni pinana vejume 'urinana. Ijihuna'e jara nimaa rojujaho Godoni vaji navu. ²²Ja nimai ijihuni ira hena vejume joni oja maa renajihuna'e nimaa nimaa vwehu jona oja mi'avara. 'Ene oja vamaa kami rene roe oja 'ekara'avara. ²³Godoni Ira mai'o hiji'ina ka'ene majama nama vahuni vaji kú'o nahenaara. Ijihuni majaho ja 'ina ka'ene pa'arehunijaho pana kaivo papa'arehunijino ja kú'o nahenaara. ²⁴Ijihuna'e ea maho'o sinara sa'ina 'ee puni pinanijaho sinara puni sonapo jaraa navuja'ina. 'Ena'omo sinarapo sarasa'ej'e sonijija uha arihu ja'ina. ²⁵'Enakaivo Natohwi jihuni Irijaho majama nama va'una'omo ijaho Ira ka'ene ja najahajina.

Muna Mai'o Hiji'inijine 'Ee Ea Ariramaijihina

2 ¹Ijihuna'e ea 'aho'a túa paveti'avara 'ee ea papisivisa'avara 'ee masapa puna'i aroaroti panami'avara 'ee ea 'ahopuni kukui jihuna'e oja sisea pavwiha'avara 'ee ea 'aho'a parona'avara. ²'Enakaivo musiapo musaru ura renau ja'ina'e ja Godoni Iriji ura rena'avara. 'Enareje veje ijara ja ni'ajihie maranie emarene 'uri'avara. ³Ijihuni majaho Natohwi jihuni vweijaho ja nihejara. ⁴Ja Huni roajaho Hu muna ka'ene mai'u hiji'ina ka'ene emaapo senavajina. 'Enakaivo Godira Huni urijino Hu iji pijaha jihuna'e Godoni una'ijaho mavarasa'ina. ⁵Ja 'u'o areri muna ka'ene mai'u hiji'ina ka'ene 'eke 'Avena huni ara vejara ka'ene ariramaa rejuri pirisiti jihina. 'Ena'omo 'avena huni swasa ka'ene Godi teamamu ja'ina'e

Jesu Keriso oni vaji swasa vejura. ⁶'Enajihuna'e Godoni Ira vaji ija'ina 'waramana.

Heha! Na Muna mamaa mavarasa'ina rira mu'oi naminuji iji
pijaharejo Saiani ranavuta. 'Ena'omo ea irara Hu nimaa nimaa
ro'amajaho hu niho'o patemuhuna 'úmana.

⁷Ja ea ka'ene nimaa roj'iini jihipuna'i ijaho Hu niho'o mavarasa'ina
kaivo ea ka'ene ara veji'inijipo ike munakaho pi'onavara. 'Eju'ukame
iji muna kajara tukeja ka'ene rira mu'ojaho aneanesina rene namu.

⁸'Ene muna ka'ene amaarenane 'ee muna ka'ene tanurihujina. Ijihuni
maiijaho pu Ira pahene vejujihuna'e pu eha sisea apehuna'e iji pijihara.

⁹'Enakaivo ja iji pijihari ejina 'ee pirisitia ka'ene ea nimaa nimaijina
'ee ea ariramaa'omo ja Godoni ea rejara. 'Ena'omo ja Huni mamaijji
rone ta'arohuna 'ee Hura nutuv'iina vajijino iji pijihare 'eka rova'e Huni
hanaji'ina maa vajijino irechamiana. ¹⁰Maraku'ijaho ja ea pana kaivo
iviamaa ja Godoni ea. Ja maraku'ijaho numiravujaho paapejara kaivo
iviamaa numiravujaho apejara.

Kerisora Ahia Apenaja'ina'e Apehuna

¹¹Ehu nuna ka'ene na ja oja mihi'inakije na 'ejahia 'waravu. Ja
iviamaa ara pisuri jihuna'e ja ike mwe'akaho ma'uako hihuna. Ja 'unama
ka'ene hahapo itunavura ka'ene joni oja vaji ajira vene ninakaramujaho
are'avara. ¹²Joni kara ijija Jenitaru puni vajijaho mamaa'e re'amana. Pu
ja sisea namahe 'warahuna kaivo jara mamaa ka'ene ve'avaji kimareje
vea ka'ene Hura 'aiha vei ro'amajaho Godi ta'aro'avara. ¹³Natohwi jihuni
hahijihuna'e joni kamatia puni hari hiha areri kinia ea 'ajoha'ini ja'ina.

¹⁴Areri kavana ijija ea ka'ene sisea veji'inijihi eha mihe 'ee ea ka'ene
aririji vejujihari ta'arorahuna'e Hura irechamiana. ¹⁵Ja 'unama ika'ina
vejujaho Godoni ura. 'Ena'omo ja 'unama ariramaiji ve'avajaho ea ka'ene
puruva reti'inijija puni vu'a pa'arehuna. ¹⁶Ja i'ia pa'a 'ojukúne ja paki'eje
ijara nuhiakame kú'o sisea ve'ava kaivo ja i'ia pa'anakúne ivi'a Godoni
pweapo vejula'ina'e ve'avara. ¹⁷Ea maho'o puni hura ve'avara 'ee vwehu
jona oja mi'avara 'ee Godoni hura vene 'ee kinia huni hura ve'avara.

¹⁸Pwee! Joni mama'ini jihipuni hura vene 'ee puni hararu hi'avara. 'Ene
ea ka'ene mamaaru vene 'ee ajuarasahe hijujihi punaru paveha kaivo
ea sisei 'ahiu jihipuni hari hine 'ee puni hura 'u'o ve'avara. ¹⁹Ijihuni
maiijaho ea irara Godona venahuroji'i temuka 'ee siseisei hinuni vaja 'ee
sise'i 'ahauri vajijino hura vene 'ee puni hari hinujaho Godi ura renuna.
²⁰Ja sisea vejakame pu sise'i 'ahl'eje ja kirasahe masuani hi'ava jihuni
eha ijaho irake? 'Enakaivo ja mamaijji vejujihuna'e sisei hiji'i masuani
kirasahe va'avajaho ijara Godi teama'en. ²¹Ijihuni maijaho ja ija'ina
vehuna'e 'umenaana. Kerisoho jonijihuna'e sisei hinana. 'Enarena Hura
vena kaja'ina'e ja 'u'o Huni ma'ajii 'ahi 'ararihae vehuna'e najahana. ²²Hu

sisea pina pavenanana 'ee Huni ira vaja ira'ata pina pahejara. ²³Pura ira sisea 'waravajaho Hu eha pavenanana 'ee Hu haha hiamani vajijaho Hu eha pavenanana. 'Enakaivo Godira 'otua ariramaa mihuniji Huhusu nimaavetiana. ²⁴'Enakaivo Hura Huhusu núni sisea Huni haha 'ahi apena va'e korosia 'ahi ajimana. 'Ejakame nú sisei jihuni 'unamijaho kwamasa'ika'i ariramaa hihuna. 'Enajihuna'e Huni haha ka'ene puachamajara rejume ja maraniana. ²⁵Ja niho'o na'ia mapoka sipiepo 'unama asisame va'uja'ina'e va'ara kaivo iviamaa ja kú'ló 'uname Sipia 'Ajoha'ina 'ee joni 'avena 'Ajoha'ini jihuni roara.

Napasina 'Ee Paru'ina Godira Ura Renuja'ina'e Hihunijina

3 ¹Napare 'unama nikwinu'ina kajino paruhu jopuni hari hi'avara. ²'Ejakame parua 'aho'a ka'ene ike Irake pahene vejujija ira pa'warahuna vo napahwa puni kara ijipo venaе pu nimaarohuna. ³'Enakaivo pu hine ki'eje jara arira one 'ee epuni hora vene 'ee kara jonijipo reje pu Ira ikaho hene vehuna. ³'Enakúne ja paki'eje sarira ka'ene haha 'ahi húmata muchame ataa 'aunua korutia name 'ee ateha ka'ene same ohuniji natohwa'e vwiha'ava. ⁴'Enakaivo veje joni oja vaji ea ka'ene apúrinanavu'e hinujara kara mamaa pasiserasahuna ka'ene vivinui sonasahe kara ka'ene Godi niho'o ura rena paranujino naja'avara. ⁵Ijihuni maijaho 'unama nikwinu'inakino napara akuavi'i arira'e Godoni vaji nimaaroji'i hijajija 'u'o sarira 'ene paruhwa puni hari hine 'ojara. ⁶'Enajihuna'e Seraho Eparahami oni ira hene venu jihuna'e nuni natohwe 'wamuna. 'Ejume ja huni 'apahija'e rejarakúne hora venaja'ina'e patea junaeje raka ka'ene arimaijiru ve'avara. ⁷Ja 'u'o paruhwahe hamihena kakaravii'i hijuri 'unamijino napahu jopuni hora hamiveji'i hiha. 'Ejakame joni siporuа 'unama patanu'amana. Ijihuni maijaho hu napari jihuna'e ajuasina kaivo Godoni maiji vwihanúana ka'ene majama hihunijaho ja no'o ahuma apehuna.

Maa Vejujhuna'e Ahia Sisea Apeju

⁸Ike vu'ake tanuhunijaho ikena. 'Enakúne roe ja pu'úmo vwiha kwino vwihihane 'ee ea 'ahopuna'i temuka apene 'ee vwehu núna oja mai vwihihane 'ee ja ea ichá'inijaho pavwiha'ika'i oja ajuarasaha. ⁹'Ene roe ea 'ahopo nú sise'i 'ahú'avajaho sisea eha pavene 'ee hu ira sisea 'waru'amajaho nú eha ira sisea pa'warahuna kaivo ira mamajino 'warava. Ijihuni maijaho ja mamaa'e vehuni jihuna'e Hu ja iji pijjhana. 'Ejakame ja aacha mamaa apehuna. ¹⁰Godoni irijaho ika'ina'e 'waramana. Hu ura hamihena teama'eje hi'iro ve'amajaho huni iriji'o mitariji'o hamihena 'ajohakame sisea pa'wara'avara 'ee huni ira vaja papisivi'amana. ¹¹'Ene hu sisea are'i kaivo ta'arohe mamaaru ve'amana. 'Ene matauma hihuni 'unamijaho same 'ee 'unama kajihuna

kaji veji'i hinama. ¹²Ijihuni majaho Natohwi jihuni nijaho ea ka'ene ariri jihipuni haha 'ahi namu. 'Ene Huni ataijaho puni siporua he'irono 'ajohu. 'Enakaivo Natohwijaho Huni niura apene ea ka'ene sisea vejuija tanu'urihuna. ¹³A mamaiji vehuna'e ura rena parana'amajaho ea irara a sise'i 'aha'lena? ¹⁴'Enakaivo a mamai jihuni hahi sisei hi'amajaho teamaname 'ee pajume 'ee oja pahwa'usaha'amana. ¹⁵'Enakaivo na'ia mapoka Kerisoho Natohwa roji'i joni oja vaja kajino amura'e rana'avara. 'Ene joni nimaaroiji vahame 'warahunijaho amairiara'irakúne ea 'ahopo ijí he'irono apora'avajaho ja chochumano puni hora veji'i 'wara'avara. ¹⁶'Enakaivo oni vwiha veje arira'e re'amana. 'E'Irakúne emaapo vu'a ira'atijino 'wame 'ee a ninama'avajaho oni kara mamaa ka'ene Keriso oni vaji namujara veje pu junahuna. ¹⁷A sisea venajihuna'e sisei hi'amajaho mamaa pana. 'Enakaivo Godi ura renujaho a mamaa ve'ama jihuna'e sisei hi'amajaho mamaa. ¹⁸Ijihuni majaho Kerisoho ni'aha kwino sisei jihuna'e kwamana. Ariramaa ka'ene sisea pa'ajara sisea rukini jihipuni hahi kwamana. 'Enarena aherume Godoni roana. Hu hahijihuniji kwamana kaivo 'Avena vajijino vejume 'urinana. ¹⁹Hu va'e 'avena ka'ene iviamaa tipurai hijuijia vu'a 'waramana. ²⁰Ijija maraku'ijaho vuataa paheji'ina'omo Noa oni veijino Godiho makivi'i vivinui 'ajihia hi'eju'e sisima venana. 'Ene ea iropu no'opisu toa 'aha kajino aherame roana. ²¹Ikara najuhajaho Jesu Kerisora kwama 'urinaji matesarame toi sama najuhu kaivo toi samahujara ni'ajúhe veje núni haha chiha pa'arehuna areri pana. Ijaho vwiha samaa re'amarono Godi jarima 'waravu. ²²Hu akúpa 'ahi ni va'ana'omo iviamaa Godoni ija mana'inija'i hi'eju'e 'ona oji'ina 'ee mama'ina 'ee harura Huni hararu hiju.

Hia Ani'ina Reju

4 ¹Ijihuna'e Kerisoho haha hiama ja'ina ja 'u'o 'unama ija'ina vehunijaho amairiara'avara. Ijihuni majaho ea irara haha hiamujaho hu sisea venujaho aremuna. ²'Ene joni hia pwinana ijaho hahijihuni 'unamijaho kú'o pahi'avara 'ee emaapo itunavuri 'unamiji 'u'o pahi'avara kaivo Godoni urija'ina'e hi'avara. ³Ijihuni majaho joni vea ni'ima'ura ja nisame Jenitarupo ura renae 'ee hahijara ura renaujiru vejara. 'Ene 'uasa vene hahijara itunavaji vene 'ee toa sisea ine nanamie 'ee 'unama sisea vene temarasahé 'ee toa sisea ine 'unama ani ani vene 'ee godia ira'ata siseijihi oja mihura. ⁴Ijihuna'e ea kajija pu maho'o tatavujaho ja kú'o puni pwinana'a pareju'e pu jonuna'i sisea vwhane ira sisea 'waravura. ⁵'Enakaivo pura ichá'ina ka'ene vejujaho Hu 'warave eha mihuna. Ijihuni majaho Hu ea ka'ene kwamasahai'ina 'ee mai'o hijuihi 'otua veti'irono amairiaramu. ⁶Ikehuni hahi ea ka'ene kwamasahajija Godoni vu'a maiu'ina najahara. Godoni ura ijihuna'e pu haha rukina'omo pu eha apejara vo puni 'avena mai'o hiju.

Godoni Swara Hami 'Ajohi'ina

7'Ene uneunecha maho'o ikihi puni ura ijaho ni roe turana paranu. 'Enakúne jara siporua ka'ene 'ohuni jihuni hahi joni oja vwiha hamí piuhihe masuani ajuarasahe hi'avara. 8'Enakúne maho'o oja vamaa kamino rena roe oja 'ekara'avara. Ijihuni maijaho oja 'ekaravujara sisea mapoka vahamauna. 9Ja ura muka pahwenami'avara kaivo ea 'aho pu'úmo hamí ni'ajarame 'ajoara'avara. 10Ea kwinu kwino swara ani ani'ina ea 'aho'a ni'ajihuna'e 'ekajihuna'e Godoni maiji vvihanúajaho 'unama ani ani'inijino naja'avara. 11Ea irara vu'a 'wara'amajaho maka'eje hu Godira 'waramu ja'ina'e 'wara'amana 'ee ea irara ea 'aho'a ni'aji'amajaho Godira harura ka'ene mahajino ni'aji'amana. 'Ejakame uneunecha mapoka vajakino Godiho Jesu Keriso oni vaji ta'arohuna. Ijihuni maijaho pinana 'ee uneunecha mapoka Huni harura hari aneja púsa pa'ana'e navu. Ameni.

Kerisora Ahia Sisea Apenaja'ina'e Ja 'U'o Apehunjijina

12Ehu nune na ja oja mihi'ina ja pak'i'eje tata'ava. Venaka ka'ene joni roe vena puna'i renaue ja sisei hijujaho areri unenu'u pini ani'ini renau ro'ava. 13'Enakaivo temarasa'avara. Ijihuni maijaho Kerisora siseisei hinajihuni pwinana'a rene avaju. 'Ena'omo Hura ro'amajino ja Huni pinana vaji temarasaha parahuna. 14'Enajihuna'e Jesuni ihijihuna'e sise'i 'ahie 'wara'avajaho ja teamana'avara. Ijihuni maijaho 'Avena ka'ene pinana rukinijaho 'ee Godoni 'Avena ja pu'úmo hinu. 15'Enakaivo ja pak'i'eje ea 'anie kwamasaha 'ee nesa apene 'ee sisea vene 'ee varapa ani ani'ina vene 'ee epuni ura ijí ruara hi'ava jihuna'e eha sisea ape'ava. 16'Ena'omo ea irara hu Keriso oni eijihuna'e siseisei hi'amajaho hu paju'amana kaivo ijí Iha kajino Godi ta'aro'amana. 17'Enajihuna'e iviamaa aneja vene Godoni ehiji jihipuni vaja piuhiha kihuni veijina. 'Ena'omo núni vaji mako aneja ve'amajaho vi ea ka'ene Godoni ira pahene vejujija eha ichá'ina'e apeja'e?

18'Ejume ea ka'ene aririjija 'unama nih'o'o kisinijino mamaa rejara'e re'amajaho vu ea ka'ene Godi pa'ajija 'ee ea sisemaijija ichá'ina'e roe re'eja? 'úmana.

19'Enajihuna'e ea ka'ene Godoni ura ija'ina'e sisei hijujija puni ojjaho ariramaiji venareje Venina ka'ene pauchavi'ini jihuni ija tahi irechavara.

Godoni Ehija Teamana'e Ni'aji'avara

5 1Na 'u'o erutai joni vaji eruta 'waravu. Kerisora siseisei hinajaho na kavuta 'ee pinana ka'ene 'urihuni jihuni pwinana'a apehuna 'waravu. 2Godoni sipia ka'ene joni vaji hijujija uranie 'ajoha'avara. Ea 'ahopo 'waravu jihuna'e 'ajoahuna pana kaivo ijaho Godoni ura ijihuna'e

ura rena'eje 'ajoha'vara. 'Enakaivo monia ho uneunecha 'ekahuni jihuna'e 'ajoahuna pana kaivo ura rena para'eje 'ajoha'vara. ³'Ene jara sipia ka'ene 'ajoha'avarono irechamiajija 'ajoha'vara kaivo joni 'unama mamaijino vene najahi'i 'ajoha'vara. ⁴'Enakúne vea ka'ene Sipia 'Ajoha'ina Natohwijara ro'amajaho ja pinana mamaahuni i'esa ka'ene majama nahunji 'ekahuna. ⁵Ja ea maiu'ine 'unama nikwinu'ina kajino ja ea mama'ina puni hari hi'vara 'ee masuani ajuarasahe hijujino ea kwinu kwino same hi'vara. Ijihuni maijaho Godiho ea ka'ene kehi kehi vejujija ninamauna. 'Enakaivo ea ka'ene masuani hijujija maiji vwhaniujaho vajihuna. ⁶'Enajihuna'e masuani ajuarasahe Godoni ija ka'ene harura rukima'uri jihuni hari va'akame Hura Huni vea 'ahi ja 'eke taaroma'amana. ⁷Joni temuka maho'o Hu vaja'vara. Ijihuni maijaho Hura ja 'ajohauna. ⁸Ojono 'ajoarame nia hami niri'i hi'vara. Joni naka Setaniho raioni puna'i atavi'i ea pina kame mwatume i'isú'irono niria parane onu. ⁹'Enakaivo joni nimairoa vajijino kirasa'ika'i hu tanu'ura'vara. Ja nihena kavuja'ina'e vwehu jona 'aho'a mwe'okino 'unama nikwisu'ina kajino siseisei hiju. ¹⁰Ja ma'uako siseisei hi'eje Godi ka'ene maho'o majji vwhanii'inijara Huni pinana ka'ene majamano navi'ina ka'ene Keriso oni vaji 'umenaajara Hura Huhusu venae ariramaa rene nimaa rena parane harura mihe ata kirasa'vara. ¹¹Harura ka'ene aneja púsa pa'ajaho Huna. Ameni.

Túchamaa 'Ajoramajina

¹²Siveniasi núni vwea ka'ene uchaha pa'ajara ni'ajihe asura ikaho venana. 'Enakaivo na asura ma'u'uakaho ja ni'ajihe 'warame veju. Ikaho Godoni majji vwhanii'ina ka'ene nimajinakúne kirasahe kisima'ura'e rene nami'vara. ¹³Joni ma'ina ka'ene Papirani ja pu'úmo iji pijahajara 'ajoravu'e 'ee nuni hariha Makara 'ajoram. ¹⁴'Enakúne oja 'ekaravuri 'unamijino ura mina vene 'ajosara'vara. Ja ea ka'ene Keriso oni vaji hijujija matauvi'inijaho ja pu'úmunu.